

漢服春晚節目組致「重回漢唐」十週年賀詞

古水

丙申年冬月初十 / 2016-12-08

世之業商者，卑危判乎其行。逞黠恃智，稽物居奇，駟牙之輩耳，君子不屑相與。觀之古今商豪，莫不懷德抱志，針瘼匡危，不動於一時之非譽，足榮於千秋之功罪。近代以來，禮義消亡，番風大行，皇漢衣裳竟乃無由得購。於是志士攘肱，漢服門店興如迸筍，其招潮者，蜀之重回漢唐也。是店也，自其初建，徂今不過十年，而鴻猷鋪展，懋績豐隆，業內龍首之名，良可副之。其功也卓，他日漢服再度普及，勒勛必在其列也。